

Iam vero Professi votorum simplicium cum Instituto, cui se devoverunt, ejusque regulas observare jurarunt, vere iniere contractum: verasque contraxerunt spirituales obligationes: Atqui contractum proprio arbitrio frangere; spirituales obligationes, sine competentis auctoritatis licentia, non modo illicitum, sed injustum est. Ergo ad aliud Institutum, relicto primo, proprio Marte, transire nequeunt. Et si id agant, veluti fugientes considerari debent, et uti tale spuniri. — *De jure pratico Regul. Cap. IV, 1, 5, p. 217.*

Et ita normalis est in re legislatio, ac praxis S. Congregationis; ut inhaerendo Constitutionibus Apostolicis, Ordinum et Institutorum Votorum simplicium, acceptatio Postulantis etiam prohibeatur si tantum ipse jam induerit habitum alterius Instituti.

Merito sane, namque perseverantia in Professo ad virtutem refert, dum instabilitas defectum dicit; etiam non considerantes discrimen, quod intercedit inter unam, vel alteram diversi generis Sodalitatem.

Quid si id agat licentia competentis auctoritatis? Tunc gratia conceditur, praevia rationabili causa — *sed salvis juribus primaevae Instituto quaesitis.*

Caput IV.

QUID DICENDUM DE VOTO, QUOD IN CAPITULO HABENT VOTORUM SIMPLICIUM PROFESSI.

Iure Ordinario etiam Instituta votorum simplicium constant *Provinciis, et Domibus singularibus*; in quibus *Capitula* celebrantur. Haec sunt vel *Generalia* — vel *Provincialia* — vel *Conventualia*, id est *Localia*. Pauca de singulis.

§ 1.

De Capitulo Generali.

Notandum, in primis, quod omnes votorum simplicium Professi, *in potentia*, uti dicitur, habent capacitatem *ad vocem activam et passivam*: IN ACTU tamen ii tantum, qui a Const. Apostolicis et Ordinationibus specialibus *Instituti* tales declarantur, consideratis requisitis.

Sane in Capitulo Generali illi solum adesse possunt, qui aliquod officium exercent in Ordine, cui adnexum est *Votum*; uti specificè

notatur in *Statutis* peculiaribus cujuscumque Instituti.

In Capitulo Generali de gravioribus negotiis revera, quae universum spectant Institutum, tractatur — ex. gr. — de Electione Superioris Generalis: de universali ratione vivendi relate ad communitatem in genere: uno verbo de iis, pro quibus absolvendis, licentia vel confirmatio S. Sedis requiritur. In eo proinde locum tenent, qui aliquod *officium* in *Ordine* exercent, cui hujusmodi votum est adnexum, etiam hi, qui privilegio aliquo sint insigniti; denique qui legalibus gaudent requisitis.

Nunc quaeritur — an licitum sit Capitulo Generali moderare Constitutiones a S. Sede adprobatas. Nonnulli *affirmant* Doctores, data rationabili causa; dummodo alii merito *negant*; quia auctoritas inferior, majorem jurisdictionem laedere minime valet.

§ 2.

De Capitulo Provinciali.

Capitulo Provinciali illi dumtaxat accedere possunt, qui sint Provinciae filii; et habeant Votum vel ab Officio, vel a Constitutione.

Disputatum plerumque est — an qui ex altera Provincia venerit, habeat *Votum* in Capitulo. Primum videndum, utrum praecesserit juridica transfiliatio cum omnibus a jure quaesitis, vel non: et data habilitatione a competente auctoritate — *affirmative* est respondendum: secus *negative*.

§ 3.

De Capitulo Conventuali.

Idem dicendum de Capitulo Conventuali, praesertim cum in unaquaque Domo, juridica et propria moralis persona (autonomia ut ajunt) existat: ac ideo jurisdictio ad *Componentes* Communitatis utique limitatur: quae jurisdictio tamen non intelligitur, nisi *Domus* sit canonice erecta ad formam juris: hujusmodi vero erectio non habetur nisi familia regularis sit constituta: quae, post hodiernam Societatis perturbationem, Pius IX — *firmis remanentibus dispositionibus Apostolicis, ubi fieri poterit* — benigne indulset, ut constituta haberetur, *quando sit locus*, cum *tres professi* Sacerdotes extarent: et Leo XIII ad *quatuor* saltem Sacerdotes, hujusmodi dispositionem extendere voluit

— *praeter alia a Statutis specialibus cujuscumque Instituti requisita.*

His praenotatis cum in Capitulo Conventuali agatur de rebus, quae domum singularem spectant; omnes de gremio Professi suffragio gaudent ad formam Constitutionum Sodalitatis: ita ut etiam *Delegatos* ad Capitulum Generale, servatis servandis, et Provinciale, mittere valeant.

Pius IX sane, uti *dicitur in declarationibus ad litt. Encyclic. Neminem latet, n. VIII. — Professis votorum simplicium*, suffragium dedit in *Actis Capitularibus sui Conventus*, quatenus, et prout habent *solemniter* professi.

Quod dixit Summus Pontifex de Votis simplicibus, ab eo institutis, et emittendis ante professionem solemnem, dicendum est a fortiori de Professis votorum simplicium in novis Institutis: ubi enim est eadem ratio, ibi et eadem dispositio esse debet: habita tamen relatione *ad Statuta Sodalitatis.*

§ 4.

De Episcopis Instituti in Capitulo.

Solent plerumque Superiores Ordinum et Institutorum quaerere — utrum eorum Alumni ad Episcopatum evecti, possint in Capitulis locum et votum habere.

Unicuique notum est in suffragiis capitulariter ferendis summopere laudari libertatem, nedum phisicam, sed etiam moralem; atqui experientia docet, et non raro lamentatur libertatis defectus propter praesentiam sacrorum Antistitum in Capitulis; proindeque S. Congregatio, petitionibus ad hunc effectum saepe porrectis, assensum denegavit.

In his enim eo tempore, quo dignitas lucescit in Episcopis, in iuvenibus praesertim auctoritas minuitur: ideoque prudens est, ut a Capitulis se abstineant Episcopi.

§ 5.

Quid dicendum de Ordinariis, idest de Episcopis Dioecesis.

Ordinarii in Domo et Instituto *Dioecesano*, illam in omnibus jurisdictionem habent, quae supremae auctoritati Dioecesis competit. Hinc ipsi est facultas vel per se, vel per delegatum praesse in Capitulis suffragia ferentibus. *Bulla Conditae p. 1, n. IX.*

Domos fundandi, praevia inquisitione super necessaria requisita; illasque singulares tol-

lendi: Postulantes in admissione explorandi: professos etiam justa de causa, dimittendi: Domos invisendi: observantiam et disciplinam regularem commendandi: super re oeconomica rationes cognoscendi: uno verbo omnia ei licent, quae Supremae Dioecesis potestati, ut innuimus, conveniunt — *Bulla Conditae, p. 1, n. VI et seqq.*

In Institutis vero votorum simplicium a *S. Sede adprobatis*, Sedi Apostolicae, est reservata potestas Domos aperiendi, easque in canonicas erigendi: tamen dispositione *Concilii Tridentini* pro Regularibus, a Leone XIII *Congregationibus quoque votorum simplicium prorogata*, requiritur Episcopi assensus in scriptis: cui non licet nihilominus interventum praebere in canonica erectione Novitiatus, et in aliis actis, quae internam Domus administrationem respiciunt. Neque ipsi jus est admittendi Postulantes ad habitum: non ad formalem probationem, et professionem; quamvis integra maneat Episcopi Auctoritas a Concilio Tridentino ipsi tributa *in sess. XXV, Cap. XVII, de Regular. et Monialibus.*

Episcopis nequidem licet *interesse* in Capitulis Generalibus: De bonis ad Instituta pertinentibus rationem exigere, si excipias ea, quae ad Dei cultum, vel ad beneficentiam sint dicata. *Bulla Conditae, p. 11, n. IX.*

Quid de alienandis rebus, vel obiectis ad Instituta spectantibus? Hujusmodi alienatio S. Sedi est reservata; et quoad *objecta Leo XIII* in concessione licentiae, voluit impositam hanc conditionem — *dummodo non agatur de rebus in arte admodum pretiosis.*

§ 6.

Quid polleant Ordinarii in spiritualibus.

Nunc serio videndum — quid polleat Episcopus *in spiritualibus* relate ad *Instituta votorum simplicium*. Et imprimis distinguere fas est — utrum agatur.

1. De Institutis Dioecesanis.
2. Vel de Institutis Pontificiis.

Et si *de his* utrum agatur de sodalitatibus Presbyterorum an de Societatibus Virorum, qui Sacerdotio abstineant.

Generatim loquendo: 1. Omnes Alumni, ad forum *internum* quod attinet, Episcopi potestati subsunt.

In foro autem *externo* eidem subsunt in id quod spectat ad *censuras*: et ad ea omnia quae non sunt reservata uni Pontifici. — *Bul. Conditae p. 1, n. V.*

2. Episcoporum est Sacerdotes a sacris, a confessionibus designare, item de Sacramentorum dispensatione statuere — et hoc *pro Sodalitatibus Dioecesanis* PARITER AC PRO CETERIS — *p. 1, n. XI loc. cit.*

3. In *quarumlibet Sodalitatum domibus*, vota simplicia Profitentium, Episcopis cujusque Dioecesis jus est invisendi templa, sacraria, oratoria publica, sedes ad Sacramentum poenitentiae; de iisque opportune statuendi et jubendi — *p. 2, n. XI loc. cit.*

4. Item si aedibus Sodalitatum sint adjuncta gynaecea, orphanatrophia, valetudinaria, scholae, asyla pueris erudiendis, Episcopali, vigilantiae subsint: uno verbo ea omnia, quae spectant ad religionis magisteria: *salvis privilegiis, Bul. cit., p. 2, n. X.*

Ad singulos speciatim devenientes — si loquamur de Institutis *Dioecesanis* illico asserere esse licitum — Dioecesanae cujusvis Sodalitatis Domos Episcopis invisendi jus esto: itemque de virtutum studio disciplina cognoscendi. *p. 1, n. X, loc. cit.*, itemque designandi *Sacerdotes a Confessionibus tum Ordinarios, tum extra Ordinem ad normam constitutionis Pastoralis curae* Bened. XIV.

Quae decreta *ad virorum* etiam consocia-

tiones pertinent, *qui sacris minime* initiantur — *Bul.*, p. 2. n. VIII loc. cit.

Ipsorum etiam, *qui sacerdotio abstinent*, Episcopi erit inquirere — num disciplina ad legum normam vigeat, num quid sana doctrina morumque probitas detrimenti ceperit, num sacramenta aequa statutaque frequentia suscipiantur — *p. 2, n. XI loc. cit.*

Sin vero denique agatur de *Sodalitiis Presbyterorum* — SOLIS PRAESIDIBUS, de eorum conscientia et disciplina datum est cognoscere — *p. 2, n. XI loc. cit.*

Ceterum Episcopis super hoc titulo et in aliis, semper integra manent illa jura eis a Synodo Tridentina, uti Delegatis Apostolicis, tributa.

Sed heic *tria* sunt *corollaria* declaranda:

1. Utrum Professus votorum simplicium possit, absque licentia Superioris, confessionem sacramentalem *valide* peragere apud sacerdotem externum approbatum, dummodo facile habere posset Sacerdotem Confessarium etiam in Congregatione?

2. Utrum eidem Professo votorum simplicium, a competenti auctoritate rite a *Votis* dispensato, possit Episcopus conferre beneficia ecclesiastica absque alia facultate.

3. An Episcopus, vel Superior in Institutis.

Votorum simplicium *munia incompatibilia* permittere possit in unoquoque Individuo?

Ad primum quod attinet, juverit referre quaestionem jam agitatam a Missionariis S. Vincentii a Paulo apud S. Congregationem EE. et Regularium — cui S. Ordo in Comitibus generalibus diei XI Decembr. 1903 reposuit. — Alumnus Congregationis Missionis *valide* confiteri posse penes quemlibet Confessarium ab Ordinario loci approbatum, facto ad cautelam verbo cum SS.mo.

Ad secundum. — Cum professus votorum simplicium, ab ipsis, auctoritate competenti sit *dispensatus*, redeat ad statum, quo erat ante professionem, prono alveo exurgit, illi Beneficium ecclesiasticum — dummodo nihil aliud obsit — posse conferri, sine alia interveniente facultate.

Ad tertium. — Incompatibilia munia conferre uni eidemque personae inter Professos, prohibuit Pius Papa VI *decreto S. Congr. Super Disciplina Regulari die 11 augusti 1795*. Proindeque non licet Episcopo moderare, aut immutare jus, quod Summus Pontifex constituit: eo magis, quia Episcopo deest facultas *Dominativa* in Instituto quae manet penes Superiores; quibus ceterum data non est potestas

Summi Pontificis dispositionibus in re oppositionem afferre — Et hoc planum est.

Quaeritur denique — utrum Institutis votorum simplicium sint etiam applicandae Ordinationes litt. S. Congr. super Disciplina Regulari 27 Nov. 1892 quoad Novitios *reversos* a militia?

Videtur affirmative esse respondendum — 1° quia eorum Professio, quamvis simplex, ordinario est *perpetua* — 2° ratio est eadem cum Professis solemniter, praesertim relate ad Ordines Sacros recipiendos: hinc prudens est, ut eorum Professio protrahatur donec a militiae onere liberi fiant.

§ 7.

De Voto Praesidentis in Capitulo.

Plerumque disputatum fuit — utrum Ordinis vel Instituti votorum simplicium Protectores, vel alii in Capitulo Praesidentes, qui non sint de gremio, habeant votum deliberativum in suffragiis Capitularibus.

Plures Doctores *affirmativam* sententiam tenent. Sed negantes mihi videntur esse in veritate. Namque nisi accedat concessio S. Sedis,